



SAKSFRAMLEGG

Saksnr:	Utval:	Dato
16/2023	Formannskap/plan- og økonomiutvalet	17.01.2023

Sakshandsamar:	Arkiv:	ArkivsakID
Tore Henrik Øye		22/1311

SØKNAD OM TILSKOT TIL FISKEFREMJANDE TILTAK I BERGSDALSELVA OG MOAVATNET VAKSDAL KOMMUNE SITT FOND FOR VILT, FISKE OG FRILUFTSLIV

Vedlagte saksdokument:

Søknad om midler til fisketiltak i Bergsdalselva 2023

Kommunedirektøren sitt framlegg til vedtak:

Bergsdalen Jordbrukslag får tildelt inntil kr. 26 000,- i midlar frå «Vaksdal kommune sitt fond for vilt, fiske og friluftsliv». Midlane skal nyttast til å delfinansiere gjennomføring av fiskefremjande tiltak i Bergsdalselva og Moavatnet, i tråd med tiltaksplanen i søknaden, jf. saksutgreiing.

Tildelinga er gjort av Formannskapet og plan-/økonomiutvalet (fondsstyret), med bakgrunn i fondsvedtektene §§ 2 og 5.

Tilskotet skal primært nyttast til innkjøp av *båt/jolle, garn og tilhøyrande utstyr*, og vert betalt ut etter innsendt sluttrapport med kostnadsdokumentasjon.

Arbeidsfristen for prosjektet/tiltaka, er sett til 01.12.24 Etter dette fell midlane bort.

Saksopplysningar:

Samandrag/konklusjon (kort om saka)

«Vaksdal kommune sitt fond for vilt, fiske og friluftsliv» skal nyttast til å fremje aktivitet og engasjement kring fondsføremåla.

Regulering av Bergsdalselva til kraftproduksjon, har gjev konsekvensar for fisken, fisket og friluftslivet knytt til elva/vassdraget. I dette høvet har Bergsdalen Jordbrukslag sett i gong arbeid for å fremje desse verdiane, knytt til bruk av elva som kjelde for rekreasjon og naturoppleving. Her har laget planar om fleire, ulike tiltak, mellom anna i samarbeid med regullant og kommune.

Kommunedirektøren vurderer at søknaden om tilskot er i samsvar med fondsføremålet, og innstiller på å løyve inntil kr. 26 000,- i fondsmidlar, i tråd med søknaden.

Bakgrunn for saka

«Vaksdal kommune sitt fond for vilt, fiske og friluftsliv» skal nyttast til å fremje gjeremål innfor fondsføremåla, gjennom ulike prosjekt, tiltak og aktivitetar, jf. vedtektene § 2 «Føremål».

Fondsmidlane kjem frå regulering av Eksingedalsvassdraget og utbygging av Åsebotn kraftverk. Formannskapet/plan- og økonomiutvalet (FPØ) er fondsstyre, og vedtek tildeling av midlar etter innstilling frå administrasjonen.

I søknad av 29.11.22, søker Bergsdalen Jordbrukslag om kr. 26 000,- i tilskot frå fondet. Bakgrunnen er laget sitt initiativ for å betre miljøtilstanden og forholda for fisken, fisket og friluftslivet langs Bergsdalselva, grunna verknaden av kraftreguleringa.

Målsetjinga med prosjektet/tiltaka er mellom anna å leggje til rette for eit meir attraktiv fiske etter innlandsfisk, med prioret på følgjande tiltak:

- *Gjennomgang av elvestrekning Øye-Lid som grunnlag for ny terskelplan, rydding av elvelaup, fysisk tilrettelegging m.m.*
- *Utfisking for å redusere fiskebestanden, med innkjøp av garn/utstyr - oppfølging av iverksett arbeid. Tiltaket skal være plan- og målretta, med prioritering av område i elva som gjev best effekt.*
- *Prøvefiske og kultivering i Movatnet, med innkjøp av båt/jolle og garn. Føremålet er å fremje og leggje til rette for fiske i eit populært turområde, spesielt for barnefamiljar.*
- *Film – informasjon om fisket i Bergsdalselva. Føremålet er å stimulere til fiske som friluftslivsaktivitet, spesielt for barna og unge.*

Det er sett ned ei prosjektgruppe som skal stå for planlegging, gjennomføring og rapportering, der regullant (Eviny) og kommunen medverkar i prosessen. Det er planar om oppstart av tiltaka i 2023.

I følge søknaden er kostnaden med tiltaka budsjettert til kr. 120 000,-, med følgjande finansieringsplan:

- | | |
|---|--------------|
| • Midlar frå Bergsdalen Jordbrukslag: | kr. 14 000,- |
| • Fondstilskot Vaksdal kommune | kr. 26 000 |
| • Eigeninnsats. Prosjektgruppe (timar, køying m.m.) | kr. 80 000,- |

Søknaden om tilskot utgjer 22 % av samla kostnad, medan eigeninnsatsen utgjer 78 %, der 12 % er egne midlar og 66% er eige arbeid, inkludert køyreutgifter m.m.

Søklar viser til pågåande revisjon av dagens konsesjonsvilkår for Hamlagrøvatnet og Bergsdalsvassdraget. I dette høvet vurderer laget at planlagde tiltak er uavhengig av resultata frå vilkårsrevisjonen.

Nærare informasjon om prosjektet går fram av vedlagt søknad.

Etter årlege utlysing kom det inn to søknadar til fondet, med ein samla søknadssum på kr. 46 000,-. Frå før av i 2022, er det tildelt kr. 50 000,- frå fondet til viltføremål.

Formelt grunnlag:

- Vedtekter for Vaksdal kommune sitt fond for vilt, fiske og friluftsliv.
- Kommuneplanen sin samfunnsdel, 2017 – 2028.

Vurdering og konsekvensar:

Innhaldet i søknaden og type tiltak

Søknaden frå Bergsdalen Jordbrukslag, med mål å fremje fisken og fisket i Bergsdalselva/Moavatnet, vert vurdert å vere i tråd med føremålet som fondsmidlane skal fremje, jf. 2 og 5 i vedtektene. I dette høvet vert vilkåra for å løyve tilskot, sett på som innfridde.

Prosjektsatsinga i regi av jordbrukslag, med planlagde tiltak, tek utgangspunkt i reguleringa av Bergsdalsvassdraget til kraftføremål, med påfølgjande konsekvensar for livsmiljø/levkår, bestandssituasjon og moglegheita for fritidsfiske. I dette høvet er det gjennomført årleg og systematisk utfisking i vassdraget, for betre kvaliteten på fisken og attraktiviteten for å fiske. Her ligg ønsket om å auke merksemda om fisket i Bergsdalen, og laget samarbeider mellom anna med Dale Jakt- og Fiskarlag om å halde fiskefestival i dalføret.

No ønskjer jordbrukslaget å intensivere arbeidet med fiskefremjande tiltak. Dette skal gjerast gjennom eit organisert og tilrettelagt opplegg, der ein knyter til seg ulike samarbeidspartar, mellom anna regullant, kommune og aktuelle fagmiljø. Etableringa av ei prosjektgruppe, og søknaden om fondsmidlar, er eit resultat av dette initiativet. Intensjonen i så måte, er systematisk framdrift og konkret handling.

Kommunedirektøren ser positivt på det lokale initiativet, som mellom anna er i samsvar med kommuneplanen sin samfunnsdel om å leggje til rette for opplevingar og aktivitetar, med bakgrunn i natur- og ressursgrunnlaget lokalt.

Det er opplagt eit behov for å gjennomføre tiltak som styrkjer og aktualiserer Bergsdalselva og Moavatnet som fiskelokalitetar, mellom anna grunna kraftregulering. I dette høvet meiner Kommunedirektøren at moglege tiltak kan sjåast opp mot pågåande revisjon av konsesjonsvilkåra for regulering av Hamlagrøvatnet/Bergsdalsvassdraget, der mange tiltak for å styrkje livsmiljøet for fisk og forholda for fiske, er fremja. Ansvar for eventuelt å gjennomføre dette, vil naturleg liggje til regullant (Eviny). Men samstundes er det positivt at jordbrukslaget har engasjement knytt til vassdraget, før reviderte konsesjonsvilkår ligg føre, gjennom prioritering av ulike informasjons- og tilretteleggingstiltak. Likevel ligg det vilkår om tiltak/gjeremål i gjeldande konsesjon, som regullanten har ansvar for å følgje opp. Her er det viktig med samarbeid og kombinerte tiltak.

Fondskapital og bruk av tilgjengelege midlar

Fondskapitalen til «Vaksdal kommune sitt fond for vilt, fiske og friluftsliv» var kr. 984 141,- per-01.12.22. I følgje vedtektene § 3, skal grunnkapitalen (bunden kapital) vere kr. 250 000,-. Midlar ut over dette er frie fondsmidlar.

Fondssaldoen gjev eit vidt handlingsrom for tildeling av midlar frå fondet, også ut frå søknadane som er komne inn ved årets søknadsomgang. I dette høvet er det økonomisk grunnlag for å løyve kr. 26 000,- i tilskot til jordbrukslaget, i tråd med søknaden frå laget.

I høve til vedtektene § 5, er det for ein 5-årsperiode, følgjande mål om fordeling av fondsmidlar mellom dei ulike fondsføremåla:

- Fiske: 50 % Vilt: 25 % Friluftsliv 25 %

Status viser følgjande fordeling i den siste femårsperioden, inkl. 2022 (omtrentleg/atterhald om feil):

- Fiske: 68 % Vilt: 19 % Friluftsliv 13 %

Bruken dei siste fem åra, viser relativ stor overvekt på fiskeføremål, og mindre bruk på vilt- og friluftslivstiltak enn målsetjinga. Bruken uttrykker aktiviteten – og interessa for midlane - innanfor dei ulike fondsføremåla. Dette forholdet bør sakshandsamar vere merksam på framover, med tanke på marknadsføring av midlane, og stimulering til tiltak innanfor vilt og friluftsliv. Kommunedirektøren innstiller likevel på løyving av midlar til fiskeføremål, sjølv om de er skeiv fordeling mellom fondsføremål fram til no. I dette høvet vert aktivitet sett på som det viktigaste kriteriet for tildeling.

Konklusjon/innstilling

Med bakgrunn i fondsvedtektene, innhaldet i søknaden og tilgjengeleg fondskapital, gjer Kommunedirektøren framlegg om løyve kr. 26 000,- i tilskot til Bergsdalen Jordbrukslag for gjennomføring av fiskefremjande tiltak i Bergsdalselva og Moavatnet.